



Tunumi aalisarnikkut piniarnikkullu inuussutissarsiutinik ineriartortitsinissaq, tassungalu ilanngullugu tunitsivinnik attanneqarsinnaasunik pilersitsinissaq kiisalu Ittoqqortoormiuni, Tasiilami eqqaannilu aalisariutinik ineriartortitsinissamut pitsaasunik tunngavissaqarnissaq pillugit apeqquteqaat aallaavigalugu oqallinnissamik siunnersuut.
(Inatsisartunut ilaasortaq Hans Enoksen, Partii Naleraq)

Hans Enoksenip, Parti Naleraq, apeqquteqaat aallaavigalugu oqallinnissamik siunnersuutaanut Demokraatini qujavugut. Tassani takutinneqarpoq partiitta politikkikkut eqqarsaqqissaarsinnaanikkullu qanoq assigiinnigitsiginerat.

Isumaqatigaarput Ittoqqortoormiini, Tasiilami eqqaanilu inuussutissarsiornikkut ineriartortitsisoqartariaqarmat. Isumaqatigiinnerpulli kipivoq inuussutissarsiornikkut qanoq ineriartortitsinissamut apeqqut tikinneqarmat. Partiiuvugut social liberaalit taamaattumik isumaqarpugut tulluannitsoq naalagaaffit imaluunniit nunatsinni Namminersorlutik Oqartussat inuussutissarsiornikkut suliniutinik aallartitsisassappata. Tamanna eqqarsaqqissaarnikkut periutsititigullu tunngaveqarpoq.

Eqqarsaqqissaarnek tunngavigalugu isumaqarpugut inuussutissarsiutit inunnit pilersinneqartussaasut naalagaaffimmiunngitsoq. Periutsillu pillugit kalaallit nunaanni inuussutissarsiornikkut pissutsit qiviaannarsinnaavagut inuussutissarsiornikkut nakkaannikut sumi tamaani takussaammata pissutaalluni pisortat piginnittuunerat imaluunniit aqutsinerat. Aamma tamarmik ilisarnaatigaat siunertaqarnikummata maannakkut Inatsisartunut ilaasortaq Hans Enoksenip saqqummiussaasa asserluinnaanik. Nunami aalisarnek nukittorsarniarlugu inuillu avinngarusimasumiittut iluamik isertitaqartilerusullugit.

Qanoq iliorluni inuussutissarsiutit uummarissarneqarnissaanerannut politikkikkut isummertaatsip assigiinniginnerata saniatigut periutsit tungaasigut pissutsit marlussuit tikkuarusuppagut. Aalisakkanik tunisassiornermi attaveqaatit ingerlalluartaqarput. Aterneqartussaapput innaallagiat, imeq kiisalu tunisassiat aamma assartorneqartussaapput. Sumiiffinni pineqartuni innaallagiatarnikkut imeqarnikkullu periarfissat qanoq pitsaatiginersut ilisimanngilarput, ataaserli nunami maani sumiiffinni allani kinguneqarnerlutsitsisarsimasoq eqqarsaatigisariaqarparput.

Tunumi aalisarnikkut aalaakkaasumik isertitaqartalernissamut sinerissamut qanittumi aalisarnek imaattariaqanngilaq pinngitsoorani tunngaviussasoq. Ilisimavarput kalaallit aalisariutaanni imarsiortut pikkorissut pisariaqartinneqartut soorlu aamma nioqqutissanik assartuinermi taamaattoq. Immaqa pitsaanerussaag isorliunerusuniittunik avataasiortuni inuttaasinnaasunik ilinniartitsigutta pitsaanerussaqqooqaaq, akissarsiat pitsaammata sulisullu aalaakkaasuullutik. Isumaqaraanni aalisarnek piniarnerlu pioreersut tunngavigalugit inuussutissarsiutinik pilersitsinissaq pingaaruteqartoq oqaatigissavarput aallaaniarneq periarfissaqarluareermata taamatullu takornarianik aalisartitsisarnek taakkunungalu atatillugu pisisusaqarpoq amerlasuunik Tasiilamiit timmisartumik akunneq ataaseq atorlugu ornittarialimmi. Taamatut aallaaniarneq aalisarnerlu kulturimut pioreersumut qanittuupput aallartinniarannilu



aningaasartorfiusarialissuunatik aamma aalikkanut pisanut isertitat annertunerujuupput iluanaarniutigalugu aalisarnermiit.

Kisianni pisarnitsitut isumaqarpugut suliniutit taamaattut innuttaasut aallartittariaqaraat aallartitsisuunatik naalakkersuisut ungasissorsuarmitut.

Taamatut oqaaseqarluta oqallinneq soqutiginartoq pillugu qujavugut kissaatiginngilarpulli inatsisartut oqaaseqaateqarnissaanut siunnersuut ilalissallugu.